

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱԿԻ ԲՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Է. Տարի, Թիւ 302, Ուրբաթ, 25 Սեպտեմբեր, 2015

ՀԱՄԱՅՆՔԱՅԻՆ

ՀՀ Վերանկախացման 24 Ամեակին Նուիրուած Աշակերտական Ձեռնարկ Քուէյթի Ազգային Վարժարանէն ներս

«Կեցցէ՛ այն Հայաստանը, որ վաղն է գալու»:

Մովսէս Գորգիսեան



«Համաձայն էք, որ Հայաստանի Հանրապետութիւնը լինի անկախ, ժողովրդավարական հանրապետութիւն՝ Խ.Ս.Հ.Ս. կազմից դուրս»:

Վերոնշեալը 21 Սեպտեմբեր 1991ին, Հայաստանի Հանրապետութեան տարածքին մէջ Գերագոյն Խորհուրդի կազմակերպած հանրաքուէի հարցումն էր: Հայ ժողովուրդը միասնաբար, շուրջ 99% ձայներու մեծամասնութեամբ, «ԱՅՈ» ըսաւ անկախութեան: Իսկ 23 Սեպտեմբեր 1991ին, ՀՀ Գերագոյն Խորհուրդը

ամփոփեց քուէարկութեան արդիւնքները եւ Հայաստանի Հանրապետութիւնը հռչակեց անկախ հանրապետութիւն:

Երկուշաբթի, 21 Սեպտեմբեր 2015ի առաւօտուն, Քուէյթի Ազգային Վարժարանի աշակերտութիւնը ոգեկոչեց ՀՀ Անկախութեան 24 ամեակը, վարժարանի ուսուցչաց կազմի եւ տնօրէնութեան ներկայութեան:

Բացման խօսքը արտասանեց ԺԱ կարգի աշակերտուհի Սէրլի Թովմասեան: Ան շնորհաւորելէ ետք բոլորը, վեր առաւ



ազատութեան եւ անկախութեան գաղափարները. «Անկախութիւն հնարաւոր չէ ունենալ առանց ազատութեան: Ազատութիւնը կը վերաբերի ոչ միայն երկրին, այլ նաեւ քաղաքացիներուն: Այսինքն նախ մարդ ինքը պէտք է ազատ ըլլայ, որպէսզի ձգտի հասնիլ հայրենիքի ազատութեան»: Յիշելով Արցախեան հերոսամարտը, շեշտեց, որ անկախութիւնը կարելի էր

ձեռք բերել ի գին անձնուրաց հայորդիներու թափած արեան. «Արցախեան մարտերուն շատ երիտասարդներ գացին պատերազմի, շատեր իրենց կեանքը զոհեցին անոր համար: Անոնք ներքին ազատութիւն ունէին, եւ այդ ազատութիւնն էր, որ ապահովեց մեր այսօրուան անկախութիւնը»:

Յաջորդիւ Ե կարգի աշակերտները երգեցին «Հայաստան» եւ «Ազգ Փառապանծ» երգերը, բարձր տրամադրութիւն ստեղծելով բոլորին մօտ:

Այնուհետեւ խօսք արտասանեց Քուէթի Ազգային Վարժարանի տնօրէն Պրն. Մանուկ Մանուկեան: Վերաբժեւորելով մերօրեայ հերոսներուն յամառ պայքարը՝ յանուն հայրենիքի անկախութեան, շեշտեց, որ իւրաքանչիւր հայ մարդ՝ Հայաստանի թէ սփիւռքի մէջ, պէտք է ունենայ ազգային պատկանելիութեան վեհ գիտակցութիւնը. «Տարիներ առաջ մեր սերունդը երազեց ունենալ հայրենիք: Յամառ պայքարի շնորհիւ մենք Հայաստանը կրկին ունեցանք: Այժմ մեր պարտքն է պահպանել զայն՝ ըլլալով ազնիւ քաղաքացիներ ու վառ պահելով մեր հոգեւոր մշակոյթի մնայուն արժէքները: Կեցցե՛ հայ ժողովուրդը եւ կեցցե՛ Մայր Հայաստանը», եզրափակելով իր խօսքը ըսաւ Պրն. Մանուկ:



Ուրախութեամբ կը տեղեկացնենք, որ «Կանաչեան» երգչախումբի փորձերը սկսած են: Կը հրաւիրենք մեր երաժշտասեր երիտասարդները միանալու մեզի:

Փորձերը տեղի կ'ունենան Ազգային Վարժարանէն ներս Երկուշաբթի, Չորեքշաբթի եւ Շաբաթ օրերը:

Երկուշաբթի-Չորեքշաբթի ժամը 7:30ին աղջկանց փորձերը, 9:00ին տղոց Շաբաթ 9:00ին միասնական փորձ

WWW.ARMENIANPRELACYKW.ORG

ՀԱՅԿԱԿԱՆ

Հայաստանի Եւ Ազրայէճանի Արտաքին Գործոց Նախարարներու Հանդիպում



Միաւորուած ազգերու կազմակերպութեան Ընդհանուր ժողովի 70-րդ նստաշրջանի աշխատանքներուն մասնակցելու նպատակով 24 Սեպտեմբերին Նիւ Եորք պիտի երթայ Հայաստանի արտաքին գործոց նախարար Էդուարդ Նալբանդեան:

հանդիպումներուն:

Նախարարը պիտի մասնակցի այս ծիրին մէջ տեղի ունենալիք բարձրաստիճան համաժողովներուն եւ

Նախատեսուած է, որ նախարար Նալբանդեան հանդիպում ունենայ ԵԱՀԿ-ի Մինսքի խմբակի համանախագահներուն եւ Ազրայէճանի արտաքին գործոց նախարարին հետ:

Նիւ Եորքի մէջ Էդուարդ Նալբանդեան հանդիպումներ պիտի ունենայ նաեւ այլ երկիրներու իր պաշտօնակիցներուն հետ:

«Լեռնային Ղարաբաղի Տագնապը Սառեցուած Զէ» Կ՛ըսէ Ուորլիք



ԵԱՀԿ-ի Մինսքի խմբակի ամերիկացի համանախագահ Ճէյմս Ուորլիք «Պի.Պի.Սի.»-ի ազրայէճանական ծառայութեան հետ հարցազրոյցի մը ընթացքին յայտնած է, որ Մինսքի խմբակի համանախագահները կը շարունակեն աշխատանքը դարաբաղեան հիմնախնդրի հակամարտող կողմերուն հետ համապարփակ համաձայնագիրի մանրամասնութիւններուն շուրջ, սակայն այս հարցը

նախ եւ առաջ կախեալ է երկու երկիրներու նախագահներու քաղաքական կամքէն: Ան նշած է, որ Լեռնային Ղարաբաղի տագնապը սառեցուած չէ:

Ան մտահոգութիւն յայտնած է հայ-ազրայէճանական սահմանին եւ դարաբաղեան-ազրայէճանական սահմանագիծին վրայ լարուածութեան աճին գծով՝ ընդգծելով, որ ծանր զէնքերու օգտագործումը անթոյլատրելի է: «Մենք մասնաւորապէս մտահոգուած ենք խաղաղ բնակչութեան շրջանակին մէջ արձանագրուող կորուստներուն առնչութեամբ եւ կոչ ուղղած ենք կողմերուն ձեռնարկելու հաւանական բոլոր քայլերուն՝ այդպիսի բռնութիւնը կանխարգիլելու համար: Յանուն կացութեան կայունացման՝ մենք կը շարունակենք քննարկումները վստահութեան ստեղծման եւ կողմերուն միջեւ բանակցութիւններու աւելի կառուցողական մթնոլորտի համար», ըսած է Ուորլիք՝ ընդգծելով, որ ՄԱԿ-ի Ընդհանուր ժողովի հերթական նստաշրջանին ընթացքին Հայաստանի եւ Ազրայէճանի արտաքին գործոց նախարարներու հանդիպումին ընթացքին նախ եւ առաջ պիտի քննարկուին լարուածութեան թուլացման ու զինադադարի դրութեան պահպանման առնչուող հարցեր:

Հայաստանի Վարչապետը Պեյճինկի Մեջ Քննարկած Է Ներդրումային Ծրագիրներու Ֆինանսավորման Կարելիությունները

Հայաստանի Հանրապետության վարչապետ Յովիկ Աբրահամեան 23 Սեպտեմբերին Փեքինի մեջ հանդիպում ունեցած է Չինաստանի Արտածման-ներածման դրամատան խորհուրդի նախագահի տեղակալ Լիու Լեանքի հետ:

Զրուցակիցները քննարկած են Արտածման-ներածման դրամատան մասնակցությամբ Հայաստանի մեջ շարք մը ներդրումային ծրագիրներու ֆինանսավորման կարելիությունները, համագործակցության նախատեսուող ուղղությունները:

Վարչապետ Աբրահամեան նշած է, որ Հայաստան կարելոր կը նկատէ տնտեսության մեջ չինական ընկերություններու ներգրաւածությունը: Անոր համաձայն, վերջին տարիներուն չինական կողմին հետ քննարկուած են Հայաստանի մեջ շարք մը լայնածաւալ ներդրումային ծրագիրներու, որոնց կարգին՝ Հայաստանի հարաւային երկաթուղիի կառուցման կարելիությունները:

Լիու Լեանք ընդգծած է, որ մեծապէս հետամուտ են խորացնելու Հայաստանի հետ տնտեսական յարաբերությունները եւ վստահութիւն յայտնած է այն մասին, որ յառաջիկային փոխադարձ գործակցութիւնը առաւել եւս պիտի ընդարձակուի ու զարգանայ: Ան կարելոր նկատած է Իրան-Հայաստան երկաթուղիի շինարարութիւնը, որ կարելոր նշանակութիւն կրնայ ունենալ շրջանի զարգացման առումով:

Հանդիպումին ընթացքին զրուցակիցները քննարկած են երկկողմանի հետաքրքրութիւն ներկայացնող այլ հարցեր:

Նոյն օրը վարչապետ Աբրահամեանն ու անոր գլխավորած պատուիրակության անդամները Փեքինի մեջ այցելած են Ամառնային պալատ, որ կառուցուած է Քինկ Տինասթիայի օրով 1750 թուականին, եւ որ հանդիսացած է թագաւորական ամառնային նստավայր: Հիւրերը ծանօթացած են Ամառնային պալատի պատմության, չինական արուեստի նմուշներուն:

Գարեգին Բ. Կաթողիկոս Ընդունած Է Հայ Կաթողիկէ Եկեղեցւոյ Գրիգոր Պետրոս Ի. Կաթողիկոս Պատրիարքը

23 Սեպտեմբերին Ամենայն Հայոց Գարեգին Բ. կաթողիկոս Մայր աթոռ Ս. Էջմիածինի մեջ ընդունած է Հայ կաթողիկէ եկեղեցւոյ Գրիգոր Պետրոս Ի. կաթողիկոս պատրիարքը՝ ընկերակցությամբ Հայաստանի, Վրաստանի եւ Արեւելեան Եւրոպայի մեջ Հայ կաթողիկէ եկեղեցւոյ առաջնորդ Ռաֆայէլ արք. Մինասեանի: Ասիկա նորընտիր պատրիարքին առաջին այցելութիւնն էր Հայաստան եւ Մայր աթոռ Ս. Էջմիածին: Այս մասին կը տեղեկացնեն Մայր աթոռ Ս. Էջմիածինի տեղեկատուական համակարգէն:

Հանդիպման ընթացքին Ամենայն Հայոց կաթողիկոսը շնորհաւորած է Գրիգոր Պետրոս Ի. պատրիարքը՝ ընտրության ու գահակալության առիթով եւ անոր մաղթած է արգասաբեր ծառայութիւն:

Իր խօսքին մեջ ան գնահատանքով ընդգծած է, որ վերջին տարիներուն Հայաստանեայց առաքելական եւ Հռոմի կաթողիկէ եկեղեցւոյ միջեւ յարաբերութիւնները վերելք կ'ապրին եւ յատկանշուած են սերտ համագործակցութեամբ:

Այս առիթով Ամենայն Հայոց հայրապետը գոհունակութեամբ յիշած է Հայոց ցեղասպանութեան 100-ամեակին առիթով Հռոմի Ֆրանչիսկոս պապին կողմէ 12 ապրիլին Վատիկանի Ս. Պետրոս տաճարին մեջ մատուցուած Ս. պատարագը եւ պապին կողմէ արտասանուած ուղերձը՝ մարդկութեան կեանքին մեջ նորանոր ոճիւրներու եւ ցեղասպանութիւններու կանխարգիլման վերաբերող: Ան հաստատած է, որ համաշխարհային զարգացումներու արդի պայմաններուն մեջ եկեղեցիները արդարութեան ուղին կրնան հարթել միմիայն միացեալ ջանքերով, փոխադարձ աջակցութեամբ եւ աղօթքով:

Իր կարգին, ամենապատիւ հոգեւոր տէրը շնորհակալութիւն յայտնած է Ամենայն Հայոց կաթողիկոսին՝ իր ընտրութեան առիթով յղուած շնորհաւորական ուղերձին եւ մաղթանքներուն համար: Զրոյցին ընթացքին Գրիգոր Պետրոս Ի. կաթողիկոս պատրիարքը նշած է, որ պիտի ջանայ ուժերու ներածին չափով իր հոգեւոր փորձառութիւնը ծառայեցնել ի շահ իր հօտին, ինչպէս նաեւ զօրացնել յարաբերութիւնները Հայաստանեայց առաքելական Ս. եկեղեցւոյ հետ:

Հանդիպման ներկայ եղած են Մայր աթոռ Ս. Էջմիածինի արտաքին յարաբերութիւններու եւ արարողակարգի բաժանմունքի տնօրէն Նաթան արք. Յովհաննիսեան, Մայր աթոռի լուսարարապետ Յովնան եպս. Յակոբեան եւ Մայր աթոռի միջեկեղեցական յարաբերութիւններու բաժանմունքի տնօրէն Շահէ վրդ. Անանեան:

Հոգեւոր Տէրը Այցելեց Սփիւռքի Նախարարութեան



22 Սեպտեմբերին Հայ կաթողիկէ եկեղեցւոյ Գրիգոր Պետրոս Ի. կաթողիկոս պատրիարքը, որ Հայաստան կը գտնուի Հայաստանի նախագահին հրաւերով մասնակցելու Հայոց ցեղասպանութեան 100-ամեակին նուիրուած ձեռնարկները համակարգող պետական յանձնաժողովի նիստին, այցելած է Հայաստանի Հանրապետութեան սփիւռքի նախարարութիւն:

Ողջունելով բարձրաստիճան հիւրը՝ նախարար Հրանուշ Յակոբեան շնորհաւորած է զայն՝ պատրիարք ընտրուելուն առիթով եւ ուրախութիւն յայտնած, որ ան նոր կարգավիճակով կ'այցելէ ազատ ու անկախ Հայաստանի Հանրապետութիւն: Նախարարը նորընտիր հոգեւոր տէրը տեղեակ պահած է, որ սփիւռքի նախարարութիւնը սերտօրէն կը համագործակցի Հայաստանի Հայ կաթողիկէ եկեղեցւոյ հետ եւ դրուատանքով խօսած է առաջնորդ Ռաֆայել արք. Մինասեանի նուիրեալ աշխատանքին մասին: Ան յատուկ կերպով անդրադարձած է սուրիահայերուն աջակցելու նպատակով կատարուող միացեալ նախաձեռնութիւններուն, ինչպէս նաեւ Զմմառու վանքի մատենադարանի ձեռագիրներու թուայնացման աշխատանքներուն, որոնց շնորհիւ մշակութային այդ թանկարժէք նմուշները փրկուեցան ոչնչացումէն եւ հասանելի դարձան ապագայ սերունդներուն: Նախարարը յոյս յայտնած է, որ թուայնացուած ձեռագիրներուն կրկնօրինակները տեղ կը գտնեն նաեւ Երեւանի Մեսրոպ Մաշտոցի անուան հին ձեռագիրներու հիմնարկ-մատենադարանին մեջ՝ այդպիսով եւս հասու դառնալով ուսումնասիրողներուն եւ այցելուներուն: Նախարարը երախտագիտութեամբ խօսած է նաեւ Հայ կաթողիկէ եկեղեցւոյ առաջնորդներու ունեցած անգնահատելի դերակատարութեան մասին՝ Հռոմի Ֆրանչիսկոս պապին Հայոց ցեղասպանութեան ճանաչման առիթով Վատիկանի Ս. Պետրոս տաճարին մեջ

արտասանած ճառին մէջ, որ շրջադարձային կրնայ ըլլալ Հայոց ցեղասպանութեան ճանաչման հոլովոյթին համար:

Ամենապատիւ հոգեւոր տէրը շնորհակալութիւն յայտնած է ջերմ ընդունելութեան համար եւ ըսած, որ մեծապէս կը գնահատէ հայապահպանութեան ի նպաստ իրականացուող սփիւոքի նախարարութեան գործունէութիւնը եւ պատրաստ է շարունակելու գործակցութիւնը անհրաժեշտ ծրագիրներու իրականացման համար:

Զրոյցի աւարտին նախարար Հրանտշ Յակոբեան հոգեւոր տիրոջ նուիրած է հայ մանրանկարչութեան կրկնօրինակ՝ ի յիշատակ սփիւոքի նախարարութիւն կատարած այցելութեան:

Թուրքիոյ Ընտրական Մարմինը Մերժած է Մեւան Եւանեանի Թեկնածութիւնը



«Տեւոքրաթիսպէր» կայքը կը հաղորդէ, որ Թուրքիոյ Բարձրագոյն ընտրական խորհուրդը մերժած է պոլսահայ մտաւորական, լեզուաբան Մեւան Եւանեանը Ազատական ժողովրդավարական կուսակցութեան կողմէ խորհրդարանական ընտրութիւններուն մէջ իբրեւ թեկնածու առաջադրելու դիմումը՝ անոր դատուած ըլլալուն պատճառով:

Նշենք, որ Եւանեանի թեկնածութիւնը պաշտօնապէս առաջադրուած էր 17 Սեպտեմբերին եւ ան կուսակցութեան ցուցակին մէջ կը գրաւէր առաջին դիրքը:

Յունուար 2014-էն ի վեր 11 տարի ժամկետով բանտարկուած Մեւան Եւանեան ձերբակալուած է օրէնքով իրեն պատկանող տարածքին մէջ «ապօրինի» շինարարութիւն կատարելուն համար:

Ըստ «Չորրորդ Իշխանութիւն»-ի. Հայաստանի Հանրապետութեան Տնտեսական Անկումը Սկսած է Ինքզինք Չգալի Դարձնել

Հայաստանեան «Չորրորդ իշխանութիւն» օրաթերթը 23 Սեպտեմբերի իր թիւին մէջ կը գրէ. «Հայաստանի տնտեսական անկումը սկսած է ինքզինք զգալի դարձնել: Ազգային վիճակագրութեան ծառայութիւնը Չորեքշաբթի օր հրապարակած է այս տարուան յունուար-օգոստոս ամիսներու ընկերային-տնտեսական ցուցանիշները, ըստ որոնց, տնտեսական աշխուժութեան ցուցանիշը դարձած է 3,9 առ հարիւր, երբ ընդամենը մէկ ամիս առաջ իշխանութիւնները նախատեսած էին 4,2 առ հարիւրի աճ:

«Այսինքն՝ մէկ ամսուան ընթացքին այդ ցուցանիշը նուազած է 0,3 առ հարիւրով: Ի դէպ, այս ընթացքին նուազած է նաեւ ներքին առեւտրաշրջանառութիւնը՝ 5,4 առ հարիւրով, իսկ արտաքին առեւտրաշրջանառութիւնը՝ 19,5 առ հարիւրով»:

Հայաստանի Եւ Չինաստանի Վարչապետները Քննարկած Են Իրան – Հայաստան Երկաթուղիին Հարցը

Հայաստանի Հանրապետութեան վարչապետ Յովիկ Աբրահամեան 22 Սեպտեմբերին Փեքինի մէջ հանդիպում ունեցած է Չինաստանի պետական խորհուրդի նախագահ (վարչապետ) Լի Քեցեանի հետ: Ողջունելով Հայաստանի վարչապետը՝ Չինաստանի պետական խորհուրդի նախագահը շնորհակալութիւն յայտնած է Չինաստան այցելելու իր հրաւերը ընդունելու եւ Եւրասիական տնտեսական ֆորումին մասնակցելու համար: Ան բարձր գնահատած է հայ-չինական յարաբերութիւններուն ներկայ մակարդակը եւ համոզմունք յայտնած, որ վարչապետ Աբրահամեանին այցելութիւնը Չինաստան պիտի նպաստէ փոխգործակցութեան ալ աւելի զարգացման եւ ամրապնդման:

Փաստելով, որ վերջին տարիներուն երկու երկիրներուն միջեւ բարձր մակարդակի քաղաքական երկխօսութիւնը աշխուժօրէն կը զարգանայ, Հայաստանի եւ Չինաստանի վարչապետները բարձր գնահատած են Հայաստանի Հանրապետութեան նախագահ Սերժ Սարգսեանի մարտին Չինաստան կատարած պետական այցելութիւնը, որ երկու երկիրներու բարեկամական յարաբերութիւնները որակական նոր մակարդակի բարձրացուցած է եւ նոր թափ հաղորդած հայ-չինական համագործակցութեան զարգացման: «Կ'ուզեմ շեշտել, որ Հայաստանի եւ Չինաստանի ղեկավարներուն միջեւ հանդիպումին արդիւնքներուն հիման վրայ մենք աշխուժօրէն կ'աշխատինք բոլոր մարզերուն մէջ երկկողմանի յարաբերութիւններու յառաջխաղացման եւ ձեռք բերուած պայմանաւորութիւններու իրագործման ուղղութեամբ», ըսած է Յովիկ Աբրահամեան:

Երկու երկիրներուն վարչապետները կարեւոր նկատած են ենթակառուցուածքներու զարգացման, ուժանիւթի, փոխադրամիջոցներու, քիմիական արդիւնաբերութեան, գիտատնտեսութեան, զբօսաշրջութեան, գիտութեան, կրթութեան, մշակոյթի, քաղաքացիական օդանաւորութեան մարզերուն մէջ հետագայ համագործակցութեան խորացումը, միացեալ յստակ ծրագիրներու իրականացումը: Այս շրջագիծին մէջ կարեւոր նկատուած է առեւտրական-տնտեսական համագործակցութեան հարցերով հայ-չինական միացեալ յանձնախումբի արդիւնաւէտ գործունէութիւնը:

Վարչապետ Աբրահամեան գոհունակութեամբ նշած է, որ վերջին տարիներուն երկու երկիրներուն միջեւ առեւտրական-տնտեսական յարաբերութիւնները յառաջընթաց արձանագրած են, եւ զգալի կերպով աճած է ապրանքներու շրջանառութիւնը (աւելի քան կէս միլիար տոլար): Չինաստանի վարչապետ Լի Քեցեան իր կարգին ընդգծած է, որ բոլոր մարզերուն մէջ՝ թե՛ քաղաքական, թե՛ տնտեսական եւ թե՛ մարդասիրական, գոյութիւն ունի արդիւնաւէտ փոխգործակցութիւն, եւ Չինաստանը պատրաստ է խորացնելու եւ ամրապնդելու զանոնք: Հայաստանի եւ Չինաստանի վարչապետները մանրամասն քննարկած են Իրան-Հայաստան երկաթուղիի, Հիւսիս-հարաւ ճամբու միջանցքի կառուցման ներդրումային ծրագիրները: Չինաստանի վարչապետը վերահաստատած է չինական կողմի հետաքրքրութիւնը այս հարցին մէջ: Ան պատրաստակամութիւն յայտնած է միացեալ ծրագիրներ իրականացնելու Հայաստանի ենթակառուցուածքներու զարգացման, արդիւնաբերութեան, մարդասիրական եւ այլ մարզերու մէջ:

Հանդիպումի աւարտին Յովիկ Աբրահամեան Չինաստանի վարչապետին հրաւիրած է պաշտօնական այցելութիւն կատարելու Հայաստան. հրաւերը սիրով ընդունուած է:

ՄԻՋԱԶԳԱՅԻՆ

Քերրի Ռուսիոյ Եւ Իրանի Կոչ Կ'ուղղէ Օժանդակելու Սուրիոյ Տագնապին Լուծման

Միացեալ Նահանգներու արտաքին գործոց նախարար Ճոն Քերրի յայտնեց, որ ամերիկեան բանակին մէկ զեկուցումին համաձայն, Սուրիոյ մէջ գտնուող ռուսական կործանիչներու տեսակը ցոյց կու տայ, որ անոնք ռուսական ուժերը պաշտպանելու համար են:



Ամերիկեան դիւանագիտութեան պետը Ռուսիոյ եւ Իրանի կոչ ուղղեց օժանդակելու Սուրիոյ պատերազմին վերջ տալու աշխատանքներուն՝ նշելով. «Սուրիոյ մէջ ռուսական կործանիչներու գոյութիւնը թերեւս Մոսկուայի մտադրութեանց նկատմամբ որոշ հարցականներ կը ստեղծէ»:

Ան շեշտեց. «Թէ՛ Միացեալ Նահանգներ, թէ՛ Ռուսիա կ'ուզեն Սուրիոյ մէջ ՏԱՀԵՇ-ը պարտութեան մատնել, սակայն Ուաշինկթընի կարծիքով, Մոսկուայի կողմէ Սուրիոյ նախագահ Պաշշար Ասատի աջակցութիւնը կը ներգրաւ օտար զինեալները, որոնք Սուրիոյ նախագահ Պաշշար Ասատի հեռացումը կ'ուզեն»:

Ռուսիոյ արտաքին գործոց փոխնախարար Կենատի Կաթիլով իր կարգին յայտարարեց, որ Մոսկուա կոչ կ'ուղղէ Սուրիոյ մէջ հակամարտող կողմերուն միջեւ անմիջական քաղաքական երկխօսութեան սկսելու:

Ան նշեց, որ «ահաբեկչութեան դէմ պայքարելու համար միջազգային ընտանիքը պետք է Դամասկոսի հետ համակարգում կատարէ»՝ աւելցնելով, որ ՏԱՀԵՇ-ի դէմ ամերիկեան ղեկավարութեամբ միջազգային դաշինքը Իրաքի մէջ համակարգում կը կատարէ Պաղատաւի իշխանութեանց հետ, սակայն դժբախտաբար Սուրիոյ պարագային Դամասկոսի հետ այդպիսի համագործակցութիւն մը չունի՝ աւելցնելով, որ այդպիսի համագործակցութեան մը պարագային այդ պայքարը աւելի ազդու պիտի դառնայ:

Միւս կողմէ, Գերմանիոյ արտաքին գործոց նախարարութենէն աղբիւրներ սեւուտական «Օքագ» օրաթերթին յայտնած են, որ Գերմանիոյ արտաքին գործոց նախարար Ֆրանց Վալթեր Շթայնմայեր եւ Քերրի ճշդած են սուրիական տագնապէն դուրս գալու եւ դէպի Եւրոպա եւ Գերմանիա ուղղուող սուրիացի տեղահանուածներու հոսքին վերջ տալու ճամբու քարտէս մը, որուն ծիրին մէջ շրջանի շարք մը առանցքային երկիրներ կը մասնակցին այս ողբերգութեան լուծման նոր ջանքի մը:

Ռուսիոյ արտաքին գործոց նախարար Սերկէյ Լաւրով Չորեքշաբթի օր յայտնեց, որ Ուաշինկթընի կեցուածքը Սուրիոյ նկատմամբ ռուսական կեցուածքին առնչութեամբ նուազ չափով մերժողական դարձած է:

WWW.AZTAGDAILY.COM

«ԵԱՀԿ Խորհրդարանական Վեհաժողովը Ագրպեյճան Դէտեր Պիտի Չուղարկել» Կ'ըսէ Քաներվա

«Արմէնփրես»՝ վկայակոչելով ԵԱՀԿ-ի խորհրդարանական վեհաժողովի պաշտօնական կայքը, կը հաղորդէ, որ Եւրոպական խորհուրդի Խորհրդարանական վեհաժողովի (ԵԽՄՎ) նախագահ Իլքա Քաներվա յայտարարած է, որ ԵԱՀԿ-ի խորհրդարանական վեհաժողովը Ագրպեյճանի մէջ 1 նոյեմբերին տեղի ունենալիք խորհրդարանական ընտրութիւններուն հետեւելու համար դէտեր պիտի չուղարկէ:



Ան նշած է, որ իր դեկավարած կազմակերպութիւնը նկատի առած է ԵԱՀԿ-ի ժողովրդավարական հաստատութիւններու եւ մարդու իրաւունքներու գրասենեակի (ԺՀՄԻԳ) խորհուրդները եւ հրաժարած դէտեր ուղարկել Ագրպեյճան:

Քաներվա նշած է, որ Ագրպեյճան պահանջած է կրճատել ԵԱՀԿ-ի գործընկեր ԺՀՄԻԳ-ի դէտերու առաքելութեան անդամներուն թիւը: «Այդ պատճառով կառոյցը ստիպուած է ջնջել դէտերու առաքելութեան ծրագրուող այցելութիւնը Ագրպեյճան: Կը գտնեմ, որ եթէ մեր սերտ գործընկեր ԺՀՄԻԳ-ը չի կրնար հետեւիլ Ագրպեյճանի մէջ տեղի ունենալիք ընտրութիւններուն, ապա մենք եւս ատիկա պիտի չընենք», ըսած է ԵԽՄՎ-ի նախագահը:

Նախքան այդ, Kontakt.az հաղորդած էր, որ Ագրպեյճանի արտաքին գործոց նախարար Էլմար Մամետեարով ընդունելով ԵԽՄՎ-ի յատուկ առաքելութիւնը յայտարարած է, որ Ագրպեյճանի մէջ ձեռնարկուած են անհրաժեշտ միջոցառումներ ժողովրդավարական, արդար ու թափանցիկ խորհրդարանական ընտրութիւններու համար, ստեղծուած են անհրաժեշտ պայմաններ՝ ընտրութիւններու հսկողութեան համար: Ան ԵԱՀԿ/ԺՀՄԻԳ-ի՝ ժողովրդավարական հաստատութիւններու եւ մարդու իրաւունքներու գրասենեակի լիազօրութեան չհամապատասխանող որակած է կառոյցին Ագրպեյճան դէտեր չուղարկելու որոշումը:

Մամետեարով ըսած է, որ ԵԱՀԿ-ը աւելի քան 100 միլիոն բնակչութիւն ունեցող երկիրներ 400-500 դէտ կ'ուղարկէ: Միաժամանակ, ԺՀՄԻԳ-ը կ'ուզէ 400 դէտ ուղարկել Ագրպեյճան, որ 9,5 միլիոն բնակչութիւն ունի: Ըստ անոր, այդքան երկարաժամկետ եւ կարճաժամկետ դէտերու ներկայութիւնը 125 շրջանի մէջ «չափազանց անհամաչափ է»:

Մամետեարով ըսած է, որ ԵԱՀԿ-ի առաջնակարգ հարցը պէտք է ըլլայ ընտրութիւններու թեքնիք աջակցութեան ցուցաբերումը:

Նախապէս Պաքուն մերժած էր այդ քանակութեամբ դէտեր ընդունիլ: Ագրպեյճանը, ինչպէս նաեւ ԵԱՀԿ-ի անդամ միւս պետութիւնները պարտաւոր են ընտրութիւններուն միջազգային դէտեր հրաւիրել, ինչպէս նաեւ ապահովել ԺՀՄԻԳ-ի անկախ ու անկողմնակալ աշխատանքը:

ԵԱՀԿ/ԺՀՄԻԳ-ը հրաւեր ստանալէ ետք յայտնած էր, որ կը պատրաստուի 30 երկարաժամկետ եւ 350 կարճաժամկետ դէտ ուղարկել Ագրպեյճան: Սակայն 31 օգոստոսին ԵԱՀԿ-ի մէջ Ագրպեյճանի մնայուն ներկայացուցչութիւնը յայտնած էր, որ իրենց երկիրը պատրաստ է ընդունիլ միայն 6 երկարաժամկետ եւ մինչեւ 125 կարճաժամկետ դէտ:

ՔԱԿ-ը Հրապարակած Է Խաղաղութեան Համար Իր Երեք Պայմանները

«Արմենփրես» կը հաղորդէ, որ գերմանական «Տեր Շփիկըլ» պարբերաթերթը կը յայտնէ, որ Թուրքիոյ մէջ ինքնավարութեան համար պայքարող Քրտական աշխատատարական կուսակցութեան (ՔԱԿ) զինեալ թելը հրապարակած է երկրին մէջ խաղաղութեան եւ



հաշտութեան համար իր երեք պայմանները՝ սպառնալով, որ հակառակ պարագային քիւրտերուն պայքարը պիտի շարունակուի յաւելեալ 30 տարի:

Հիւսիսային Իրաքի Կորդուաց լեռներուն վրայ ՔԱԿ-ի ռազմակայաններէն մէկուն մէջ քիւրտ ղեկավար Ալի Հայտար Քայթանի հետ զրոյցի մը ընթացքին վերջինս ըսած է, որ յուլիսէն ի վեր թուրք-քրտական բախումներու վերսկսման

մեղաւորը Թուրքիոյ նախագահ Ռեճեփ Թայիփ Էրտողանն է: ՔԱԿ-ի հիմնադիրներէն Քայթան նշած է, որ տարիներու ընթացքին կազմակերպութիւնը փոխած է իր դիրքորոշումը, եւ այժմ կը ձգտի Թուրքիոյ տարածքին մէջ ոչ թէ անկախ Քիւրտիստան, այլ քրտական ինքնավարութիւն ստեղծելու:

«Մենք միայն ինքնավարութիւն կ'ուզենք ստեղծել: Մարտերու վերսկսման միակ մեղաւորը Էրտողանն է: ՔԱԿ-ի յարձակումները միայն պատասխան են Թուրքիոյ անվտանգութեան ուժերու յարձակումներուն: Էրտողան մեր դէմ պատերազմ յայտարարած է, եւ մենք մեզ կը պաշտպանենք», ըսած է ան:

Ըստ Քայթանի, քիւրտերուն եւ Թուրքիոյ միջեւ խաղաղ բանակցութիւնները կրնան վերականգնիլ, եթէ թրքական բանակը դադրեցնէ յարձակումները, բանտէն ազատ արձակուի ՔԱԿ-ի ղեկավար Ապտիլլա Օճալան եւ չէզոք որեւէ երկիր միջնորդութիւն ստանձնէ թրքական պետութեան եւ քիւրտերուն միջեւ: «Օրինակ՝ իբրեւ միջնորդ կրնան հանդէս գալ Միացեալ Նահանգները: Այլ տարբերակ չկայ: ՔԱԿ-ի նոր մարտիկները աւելի արմատական են: Հաշտութեան համար իբրեւ տարեց սերունդ մենք վերջին կարելիութիւնն ենք Անգարայի համար: Հակառակ պարագային, պայքարը պիտի շարունակուի յաւելեալ 30 տարի», ըսած է Քայթան:

WWW.AZTARAR.COM

ԱՆԴՈՒՄ

Անկախության Նոր Սերունդի Գերխնդիրը

24 տարի առաջ, 21 Սեպտեմբեր 1991-ին, Հայաստանի քուեարկութեան իրաւունք ունեցող 2,056,758 քաղաքացիներէն 2,042,627-ը (94.39%) «Այո» ըսաւ հետեւեալ հարցումին՝ «Համաձայն եք, որ Հայաստանի Հանրապետութիւնը լինի անկախ, ժողովրդավարական հանրապետութիւն՝ Խորհրդային Միութեան կազմից դուրս»:

18 տարին լրացուցած եւ քուեարկելու իրաւունք ունեցող բոլոր քաղաքացիները խորհրդային կարգերուն մէջ ծնած ու կրթուած, խորհրդային վարք ու բարքով ապրող մարդիկ էին, որոնք սակայն ազգային նոր զարթոնքի ռահվիրաները հանդիսացան՝ դառնալով անկախութեան դրօշակիր սերունդ:

Այսօր այդ սերունդէն շատերը չկան. բազմաթիւ երիտասարդներ նահատակուեցան պատերազմի ընթացքին, ոմանք արտագաղթած են, ուրիշներ՝ թոշակի անցած: Շատեր դարձած են քաղաքական գործիչներ կամ գործարարներ (շատ յաճախ՝ երկուքը միասին), իսկ նուազ բախտաւորները մաս կը կազմեն Հայաստանի աղքատ խաւին, որ այսօր, ըստ պաշտօնական տուեալներու, Հայաստանի բնակչութեան շուրջ մէկ երրորդին չափ է®

Հիմա, սակայն, կայ նոր սերունդ մը, որուն ձայնը տակաւին քաղաքական բեմին վրայ շատ չի լսուիր, կամ՝ անոնց ներկայութիւնը երբեմն կը զգացուի քաղաքացիական շարժումներու եւ բողոք-ցոյցերու ընթացքին: 20-ականներու եւ 30-ականներու մէջ գտնուող սերունդը չունի իր նախորդին փորձն ու քաղաքական դրամագլուխը, բայց վստահաբար ունի լիարժեքօրէն ազատ ապրելու կամք եւ արդարութեան գաղափարով սնանող արժեհամակարգ:

Անկախութեան «ԱՅՈ» քուեարկած սերունդին համար Հայաստանը խորհրդային կարգերէն ազատելն ու Արցախի պատերազմը յաղթանակով աւարտել էր: Նոր սերունդը, եթէ ոչ այդքան արինակի, բայց առնուազն նոյնքան դժուարին ու բարդ մարտահրաւերի առջեւ կը գտնուի, որն է՝ ամրապնդել Հայաստանի անկախութիւնը՝ իսկապէս ժողովրդավար ու արդար պետութիւն ստեղծելով եւ աւարտին հասցնել արցախեան պայքարը՝ զինուորական յաղթանակը քաղաքական յաղթանակով ամրագրելով:

Նոր սերունդը, կը գիտակցի, որ կարելի չէ հայրենի պետական բերդը ամուր պահել եւ պայքարիլ արտաքին ճակատի վրայ, եթէ չմաքրուի ներքին փտախտը, եթէ վերջ չդրուի աղքատութեան եւ անարդարութեան, եթէ չկասեցուի արտագաղթը, եթէ ժողովրդավարութիւնը մնայ ձեւական®

Նոր սերունդը կը գիտակցի, որ ի վերջոյ, հեռու կամ մօտիկ, դաշնակից կամ թշնամի համարուող երկիրներուն համար միշտ ալ աւելի դիւրին է բերդը ներսէն գրաւել, մանաւանդ երբ խարխուլ են ներքին կարգ ու սարքին հիմերը:

Նախ եւ առաջ՝ Հայոց պետականութեան բերդը ներսէն ամրացնելու գերխնդիրն է, որ դրուած է անկախութեան նոր սերունդին առջեւ: Եւ յաջողութեան բանալին միայն հայաստանաբնակ երիտասարդութեան ձեռքերուն մէջ չի գտնուիր, այլ՝ այն գիտակցութեան մէջ, որ ժողովրդավար եւ արդար պետութիւն ստեղծելու պայքարը Հայաստանի նոր սերունդին պայքարը չէ միայն, այլ՝ համայն հայութեան կոշիւր: Ուրեմն, եկէք, վերանայինք մեր առաջնահերթութիւնները եւ անկախութեան նոր սերունդին հետ միասին հայոց պետականութեան բերդը ներսէն ամրացնելու գերխնդիրը դարձնենք Հայաստանի եւ սփիւռքի հայութեան թիւ մէկ նպատակը:

ԲԱՏՏԻ ՏՈՒՏԱԳԼԵԱՆ

ԼՈՒՐԵՐ ԳԱՂՈՒԹՆԵՐԷՆ

Հայոց Ինքնութեան, Մշակոյթին Եւ Արուեստին Նուիրուած Ցուցահանդէս

Սեպտեմբեր 3-ին Պոլսոյ «Թիւթին տեփոսու» հաստատութեան մէջ տեղի ունեցաւ ցուցահանդէսի բացում, որ կը մէկտեղէ աշխարհի զանազան անկիւններու մէջ ապրող ու ստեղծագործող 13 հայ արուեստագէտներու գործերը՝ քանդակներ, լուսանկարներ, գեղանկարներ, գծանկարչական եւ լուսանկարչական աշխատանքներ, վիտեո ժապաւեններ եւ այլն:



Սոյն ձեռնարկը իրագործուեցաւ «Անատոլու քիւլթիւր» հիմնարկին, «Գալուստ Կիւլպէնկեան» հիմնարկին, Գերմանիոյ արտաքին գործոց նախարարութեան, Պոլսոյ «Կէօթէ» հիմնարկին, Թարապիոյ մշակոյթի ակադեմիային եւ «Հէյնրիխ Սթիֆթունկ» միութեան թուրքիոյ ներկայացուցչութեան նախաձեռնութեամբ:

Բացումէն քանի մը ժամ առաջ սարքուեցաւ մամլոյ ասուլիս մը, որուն ընթացքին տեղի ունեցաւ ծանօթացում արուեստագէտներուն եւ իրենց գործերուն, նաեւ լուսարձակի տակ առնուեցան հայոց ինքնութիւնը, մշակոյթն ու արուեստը՝ հին օրերէն մինչեւ այսօր:

Ելոյթներ ունեցան ցուցահանդէսի համադրող, Պուէնսու Այրեսէն Սիլվինա Տէր Մկրտիչեան եւ «Անատոլու քիւլթիւր» հիմնարկի տնօրէն Օսման Քաւալա:


Սիլվինա Տէր Մկրտիչեան, որ զուգահեռաբար կը մասնակցի նաեւ «Վենետիկի միջազգային պիէնալ»-ին մէջ հայկական տաղաւարը ներկայացնող «Արմէնիթի» (հայութիւն) նախագիծին, նշեց, որ այս ծրագիրը 10 տարիէ ի վեր շարունակական բնոյթով իրարու կը մօտեցնէ աշխարհի զանազան երկիրներու հայ արուեստագէտները:

Օսման Քաւալա իր ելոյթին մէջ գոհունակութիւն յայտնեց իր քաղաքին մէջ հիւրընկալելու հայ արուեստագէտները՝ նման բացառիկ ցուցահանդէսով մը: Ան նկատել տուաւ, որ այս ցուցահանդէսը կը ստիպէ, որ մտածենք անցեալին ու ապագային մասին:

Ցուցահանդէսի բացման մասնակցեցան մեծ թիւով թուրք եւ օտար արուեստասէրներ: Կազմակերպիչները հրատարակած էին նաեւ բարձրորակ ալպոմ-գիրք մը, ուր չորս լեզուներով՝ հայերէն-թրքերէն-անգլերէն-գերմաներէն, ներկայացուած էին մասնակիցներն ու անոնց աշխատանքները, նաեւ անոնց խօսքը՝ այս ձեռնարկին մասին:

Մասնակից արուեստագէտներն են՝ Աշոտ Աշոտ (Երեւան-Փարիզ), Մարիան Պետոյեան (Պուէնսու Այրես), Թալին Պիլիքքիւքքճեան (Պոլիս), Հերա Պիլիքքաշճեան (Պոլիս), Սիլվինա Տէր Մկրտիչեան (Պուէնսու Այրես-Պերլին), Լինտա Կանժեան (Նիւ Եորք), Արչի Կալենց (Մոսկուա-Պերլին), Կարինէ Մատղաշեան (Երեւան), Միքայէլ Օհանջանեան (Երեւան-Ֆլորանս), Անի Սեթեան (Պոլիս), Արման Թադէոսեան (Գիւմրի-Նանսի), Սքաուր Թիւֆէնքճեան (Նիւ Եորք) եւ Մարի Զուլամեան (Պէրթուր-Լիեժ):

Դոկտ. Զաւէն Մսրրլեանի Դասախօսութիւնը՝ Նուիրուած Հայոց Ցեղասպանութեան Միջազգային Հակազդեցութեան



Կազմակերպութեամբ Թեքէան մշակութային միութեան Լոս Անճելըսի մասնաճիւղին, 25 օգոստոսին, ԹՄՄ «Պէշկէօթիւրեան» կեդրոնի սրահին մէջ տեղի ունեցաւ Պէշկէօթի Հայ աւետարանական քոլեճի բազմամեայ տնօրէն, հմուտ պատմաբան դոկտ. Զաւէն Մսրրլեանի հրապարակային դասախօսութիւնը՝ «Միջազգային հակազդեցութիւնը Հայոց ցեղասպանութեան ընթացքին եւ ետք» նիւթով:

Կազմակերպիչ վարչութեան անունով «Նոր Օր»-ի նախկին խմբագիր Վաչէ Մեմերճեան բարի գալուստ մաղթելէ ետք ներկաներուն, հրաւիրեց հիւր դասախօսին աշակերտը հանդիսացած եւ «Մասիս»-ի սինակագիր Յարութ Տեր Դաւիթեանը, որպէսզի ներկայացնէ դոկտ. Զաւէն Մսրրլեանը:

Տեր Դաւիթեան ներկայացուց ուսուցիչ, տնօրէն եւ պատմաբան Զաւէն Մսրրլեանը: Առաջին անգամը չէր, որ լոսանճելըսահայութիւնը կը վայելէր բազմաթիւ գիրքերու հեղինակ եւ 1967-էն ի վեր Պէշկէօթի Հայ աւետարանական քոլեճի տնօրէնին ներկայութիւնը:

Դոկտ. Մսրրլեան անգլերէնով եւ հայերէնով յաճախ անդրադարձած է այս թեմային: Ան նիւթը ներկայացուց գիտականօրէն, փաստերով, փաստաթուղթերով եւ ուսանելի դիտարկումներով: Բրիտանական աղբիւրներուն քաջածանօթ պատմաբանը կարդաց մէկէ աւելի փաստաթուղթերու տողերուն տակ «կորսուած» կարեւոր մասեր: Ան անդրադարձաւ Ռուսիոյ կեցուածքին, որ այդքան ալ նպաստաւոր չէր հայութեան: Ան նաեւ անդրադարձաւ կարեւոր իրողութեան մը, թէ այսօր ի՛նչ պիտի ըլլայ մեր դերը: Բանախօսը արթնութեան հրաւեր ուղղեց բոլորին, որպէսզի գիտական ճշգրիտ մօտեցումներով շարունակեն մեր դատը բարձրացնել միջազգային ատենաներու մէջ՝ հասնելու համար մեր իրաւունքներու առաւելագոյնին:

«Դիլիջան» Սենեկային Խումբի 11-րդ Համերգաշրջանին Զօրակցելու Նպատակով Հանդիպում

10 տարի առաջ «Լարք» երաժշտական ընկերակցութեան կողմէ հիմնադրուած «Դիլիջան» սենեկային երաժշտութեան համերգային շարքը նպատակ ունէր շարժելու ժամանակակից երաժշտութեան սահմանները: Համերգաշարը ստեղծեց սենեկային երաժշտութեան իր իւրայատուկ դրոշմը՝ միացնելով հինն ու նորը, արեւմտեանն ու արեւելեանը:



Մեպտեմբեր 6-ին դոկտ. Նազարէթ եւ Անի Տարագճեան ամուլը, ըստ աւանդութեան, իրենց բնակարանէն ներս հիւրընկալեցին «Դիլիջան»-ին աջակցող բարեկամներ, երաժիշտներ եւ «Լարք»-ի անձնակազմը:

Ելոյթներ ունեցան «Դիլիջան» համերգաշարի գեղարուեստական ղեկավար, ջութակահար Մովսէս Պօղոսեան, հոգաբարձութեան ատենապետ, բժիշկ Նազարէթ Տարագճեան եւ «Լարք» երաժշտական ընկերակցութեան վարիչ մարմնի ատենապետ Անդրանիկ Թորոսեան:


Ջութակահար Մովսէս Պօղոսեանը ընդհանուր գիծերու մէջ ներկայացուց յառաջիկայ տարուան ծրագիրը: Անդրանիկ Թորոսեան շեշտեց նիւթական աջակցութեան կարեւորութիւնը, յատկապէս՝ «Լարք»-ի համար, ուր կը կոփուի նորահաս սերունդի հայեցի դաստիարակութիւնը:

Երեկոյի ընթացքին կատարուած նուիրատուութիւններէն հանգանակուեցաւ 60 հազար ամերիկեան տոլար:

Համերգաշրջանի բացման առաջին համերգը տեղի պիտի ունենայ 11 Հոկտեմբերին «Ձիփեր հոլ» համերգասրահին մէջ: Համերգը նուիրուած է վաղամեծիկ Մկրտիչ Յովսէփ Ֆիտանեանի յիշատակին:

Ցեղասպանութեան Ականատեսի Գիրքի Շնորհահանդէս

Հայոց ցեղասպանութեան 100-ամեակին առիթով, նախաձեռնութեամբ «Հայկական գիտահետազոտական կեդրոն Վրաստանի մէջ» ոչ պետական կազմակերպութեան, աջակցութեամբ վիրահայոց թեմի «Հայարտուն» կեդրոնին, 9 Սեպտեմբերին յիշեալ կեդրոնի «Գալուստ Կիւլպէնկեան» սրահին մէջ տեղի ունեցաւ Հայոց ցեղասպանութեան ականատես երջանկայիշատակ Լեւոն Դիլպարեանի «Յուշեր անցեալէն» հայերէն-ռուսերէն գիրքին շնորհահանդէսը:



«Հայկական գիտահետազոտական կեդրոն Վրաստանի մէջ» կազմակերպութեան նախագահ Էմմա Ախտեան իր խօսքին մէջ անդրադարձաւ այն պատասխանատուութեան եւ պատրաստակամութեան, որուն պատճառով կեդրոնը կազմակերպեց գիրքի խմբագրութիւնը, թարգմանութիւնը եւ հրատարակութիւնը:

Գիրքի շնորհահանդէսին ներկայ էր հեղինակին թոռնուհին՝ Ռիմա Ռշտունի, որ լուսարձակի տակ առաւ այն դժուարութիւնները, որոնք դիմագրաւեց իր մեծ հօր ձեռագիրը մինչեւ գիրքի վերածելը: Ան իր երախտագիտութիւնը յայտնեց բոլոր անոնց, որոնք սատար հանդիսացան գիրքի հրատարակման:

Ենոք Թադէոսեան արժեւորեց Դիլպարեան եւ Ռշտունի ընտանիքին կատարած նուիրական գործը, շեշտելով կարեւորութիւնը լաւ հայ ըլլալու կողքին նաեւ հայ երեխաներ դաստիարակելու հանգամանքին:

Ապա խօսք առին կարգ մը անձնաւորութիւններ:

Վիրահայոց թեմի առաջնորդ Վազգէն եպս. Միրզախանեան բարձր գնահատեց հեղինակի՝ որպէս ականատեսի հայոց ցաւի, կորսնցուցած հայրենիքի մասին գրութիւնը, ընդգծելով անոր պատմելու ոճի պարզութիւնը, Արեւմտեան Հայաստանի քաղաքներու եւ գիւղերու, կենցաղի վառ նկարագրութիւնը, տեղ տալով թուրքերու եւ հայերու, քիւրտերու եւ հայերու պարզ ու շիտակ մարդոց բարեկամութեան պատկերը:

Աւարտին ներկաներուն բաժնուեցան Լեւոն Դիլպարեանի «Յուշեր անցեալէն» գիրքը հայերէն եւ ռուսերէն տարբերակներով:

ՄԱՆԿԱՊԱՏԱՆԵԿԱՆ

Ինչո՞ւ

... Մենք մժեղներ կը տեսնենք ամառը:

Ապրելու եւ բազմապատկուելու համար մժեղները պէտք ունին տաքութեան եւ խոնաւութեան: Այս պատճառով է, որ անոնց թիւը շատ մեծ կ'ըլլայ ամրան՝ գետերուն, լիճերուն, ջրակոյտերուն եւ ճահիճներուն մօտ: Երբ ձմեռը կը հասնի, անոնք կը քնանան՝ սպասելով ամրան օրերու վերադարձին:

... Արեւածաղիկները արեւուն կը հետեւին:

Բոյսերուն մեծ մասը լոյսի պէտք ունի ապրելու համար: Արեւածաղիկը շատ արագ կ'աճի երբ փոքր է: Հետեւաբար այդ շրջանին ան շատ լոյսի պէտք ունի, եւ ան իր տերեւներն ու ծաղիկը կը դարձնէ դէպի արեւ՝ երկնքին մէջ անոր ընթացքին հետեւելով: Սակայն երբ արեւածաղիկը կը դադրի աճելէ, ան այլեւս չի շարժիր:

... Մրջիւնները շարքով, ետեւ-ետեւի կը քալեն:

Մրջիւնները ետեւ-ետեւի կը քալեն, որպէսզի չկորսուին: Երբ առաջին մրջիւնը մրջնանոցէն դուրս կ'ելլէ, ան իր ետեւէն հոտ մը կը ձգէ: Այս ձեւով ան ճամբան ցոյց կու տայ, եւ միւս բոլոր մրջիւնները կը հետեւին այդ նոյն ճամբուն:



... Նորածինները ակոյալ չունին:

Երբ մանուկները կը ծնին, անոնց ակոյաները տակաւին բուսցնելու ժամանակ չեն ունեցած: Անոնք կամաց-կամաց պիտի կազմուին լինտերուն մէջ, ապա դուրս պիտի ելլեն մէկը միւսին ետեւէն, մօտաւորապէս 6-րդ ամիսէն սկսեալ: Սակայն երբեմն բացառութիւններ գոյութիւն ունին. օրինակի համար, կ'ըսուի, թէ ֆրանսայի Լուի 14-րդ թագաւորը ծնած է երկու ակոյայով:

... Միջատները լոյսի աղբիւրներու շուրջ կը դառնան:

Երբ միջատները կը թռչին իրիկունը մութին մէջ, անոնք իրենց ճամբան կը տեսնեն լուսինին շնորհիւ: Հետեւաբար երբ անոնք լոյս մը կը տեսնեն, ինչպէս՝ լուսամփոփ մը, կը կարծեն, թէ անիկա լուսինն է: Անոնք չեն կրնար իրենց ճամբան գտնել այդ լոյսին դիրքին հետեւելով, եւ կլոր-կլոր կը դառնան լոյսին շուրջ:

... «Ալօ» կ'ըսենք, երբ հեռաձայնին կը պատասխանենք:

Կ'ենթադրուի, թէ ան «հելօ» բառին աղաւաղուած ձեւն է: Անգլերէն այս բառը կը նշանակէ «բարեւ». անիկա կը գործածուի զիրար բարեւելու համար Միացեալ Նահանգներու մէջ, ուր շինուած են առաջին հեռաձայնները 19-րդ դարուն: Սակայն աշխարհին շուրջ ամէն մարդ «ալօ» չ'ըսեր: Իտալացիները կը գործածեն «փրոնթօ», իսկ ճամբոնցիները՝ «մոշի մոշի»:

ՅԱՅՏԱՐԱՐՈՒԹԻՒՆ

ՀԱՆՐԱՊԵՏԱԿԱՆ ՄԱՂԹԱՆՔ ԵՒ ԽԱՉՔԱՐԻ ԲԱՑՈՒՄ

Ուրբաթ, 2 Հոկտեմբեր 2015-ին, Սուրբ եւ Անմահ Պատարագի
աւարտին,

Նախագահութեամբ՝

Թեմիս Առաջնորդ

Գերապատիւ՝ Տ. Մասիս Ծ. Վրդ. Զօպուլեանի

Ներկայութեամբ՝

Հ.Հ. Արտակարգ եւ Լիազօր Դեսպան

Տիար՝ Ճատէլ Զարչոյուլեանի

Խաչքարի բացում ձեռամբ՝

Ազնուափայլ՝ Տիկ. Ռօզա Ծառուկեանի

Պատարագի եւ խաչքարի բացման հանդիսութենէն ետք պիտի
կատարուի մատաղօրհնէք:

Խաչքարը պիտի զետեղուի ի յիշատակ Հայոց Ցեղասպանութեան
հարիւր Ամեակին: